

**Soraarnerussutisiaqalernissamut aaqqissuussinermut peqataasussaatitaaneq pillugu  
Inatsisartut inatsisaata allangortinneqarnera pillugu Inatsisartut inatsisaat**

(Tjenestemandit ileqqaartussaatitaanerisa atorunnaarsinnera aamma skattekortit aamma  
akileraarutinut allagartat atorlugit akiliisitsisarnerup piffissaagallartumik atorunnaarsinnera)

**pillugu**

**Aningaasaqarnermut Akileraartarnermullu Ataatsimiititaliap**

**siunnersuutip aappassaaneerpeqarneranut**

**ISUMALIUTISSIISSUTAA**

Aningaasaqarnermut Akileraartarnermullu Ataatsimiititaliap suliarinninnermini kingullermik  
ilaasortarai:

Inatsisartunut ilaasortaq Aqqalu C. Jerimiassen, Atassut, siulittaasoq  
Inatsisartunut ilaasortaq Pele Broberg, Naleraq, siulittaasup tullia  
Inatsisartunut ilaasortaq Hans-Erik Enoksen, Demokraatit  
Inatsisartunut ilaasortaq Margrethe Thårup Andersen, Demokraatit  
Inatsisartunut ilaasortaq Ane Hansen, Inuit Atagatigiit

Ulloq 11. november 2025-mi siullermeerinninnerup kingorna ataatsimiititaliap siunnersuut  
misissorpaa.

**Siunnersuutip imarisaa siunertaalu**

Soraarnerussutisiaqalernissamut aaqqissuussinermut peqataasussaatitaaneq pillugu Inatsisartut  
inatsisaata allangortinneqarneranik inatsisissatut siunnersuummik Naalakkersuisut saqqum-  
miussipput.

Inatsisissatut siunnersuutip kingunerissavaa akileraarutit procentianik qaffaanermik aammalu  
akileraarutinut allagartat atorlugit akiliisitsisarnermik aaqqissuussinermut ukiuni 2026-mi 2027-  
milu atorunnaarsinneqarnissaa kiisalu tjenestemanditut atorfimmit tjenestemandit akissarsiaasa  
ileqqaartussaatitaanermik naatsorsuinnermut ilaatinneqannginnissaat, isertitali allat sulii ilan-  
ngullugit naatsorsorneqartarnissaat. Tamatuma peqatigisaanik aaqqissuussineq patajaalliseq-  
qullugu sulisartut ileqqaartussaatitaanerannut procentip 2025-misut qaffasissuseqarluni 9  
procentiunnarnissaa aalajangersarneqarpoq.

Inatsisissatut siunnersuummut nassuiaatini allassimavoq suleqatigiissitamik immikkut ilisimasalinnik inuttaqartumik pilersitsinissaq Naalakkersuisunit aalajangerneqartoq, taassumalu soraarnerussutisiaqarnermik aqqissuussinerup tamarmiusup misissornissaa suliassarissagaa, taakkunungalu ilaapput utoqqalinersiutit, tjenestemandit soraarnerussutisiaat aammalu soraarnerussutisiaqalernissamut aqqissuussinerumut peqataasussaataaneq pillugit malittarisassat. Immikkut ilisimasalinnik inuttaqartumik suleqatigiissitap sulineratigut nunatsinni innuttaasut toqqissisimanartumik aningaasaqarnikkullu isumatusaartumik atugaqarlutik utoqqalisinnaansaannik aammalu inuiaqatigiit aningaasaqarnerata oqimaaqatigiinneranik qulakkeerinnittumik utoqqalinersiaqarnermik aqqissuussinerumik ataqatigiissumik pilersitsisoqarnissaa Naalakkersuisut kissaatigaat.

Ilaatigut soraarnerussutisiaqalernissamut aqqissuussinerumut peqataasussaataaneq pillugu soraarnerussutisiaqartitsinerumi annertuumik aalajangiinnginnermi immikkut ilisimasallit sulinerisa inernerat Naalakkersuisunit utaqqimaarneqarumavoq. Inatsisissatulli siunnersuummi matumani allassimasutut soraarnerussutisiaqalernissamut aqqissuussinerumut peqataasussaataanerumi iluarsisutit ataasiakkaat ingerlannissaat maannangaaq pisariaqartinneqartoq Naalakkersuisut aalajangiipput.

### **Siunnersuutip Inatsisartunit siullermeerneqarnera**

Siunnersuut siullermeerneqarmat siunnersuut matumani pineqartoq tapersorsorluarneqarneqarpoq.

Oqaluuserisassani immikkoortut assigiinngitsut pingasut ataatsimoortillugit oqaluuserineqarnerat siullermeerinninnermi annertuumik oqallittoqarneranut sunniuteqarput.

### **Tusarniaanermut akissutit**

Siunnersuut 2025-mi 19. septemberimit 13. oktoberimut tusarniaassutigineqarpoq. Tusarniaanermut akissutit tiguneqartut siunnersuummut nassuiaatini nassuiaatigineqarput. Tusarniaanermut akissutit Naalakkersuisut siunnersuummi allannguinnissaannut tunngavissiisimangitsut ataatsimiititaliamit maluginiarneqarpoq. Soraarnerussutisiaqarnermik aqqissuussinerumi allannguutissat annertunerusut ataavartussallu immikkut ilisimasalinnik inuttaqartumik suleqatigiissitap ataatsimoortumik kaammattuutitut suliarisassaannik tunngaveqartariaqartut Naalakkersuisut isumaqarput.

### **Naalakkersuisunut allakkatigut apeqqutit**

UKA25/12-ip ataatsimiititaliami suliarineqarnerata ilaatut ataatsimiititaliaq ulloq 27. februar 2026 Naalakkersuisunut allakkatigut apeqquteqarpoq. Siunnersuummut iluarsisutissatut siunnersuutinu arlalinnut, ilaatigut taakku aningaasatigut kingunerisassaannut Naalakkersuisut oqaaseqaateqarnissaat ataatsimiititaliap kissaatigisimavaa. Naalakkersuisut akissutaat ataatsimiititaliamit ulloq 15. april 2026-mi tiguneqartoq ataatsimiititaliamit

qujassutigineqarpoq. Ataatsimiititaliap apeqqtai Naalakkersuisullu akissutaat ilanngussaq 1-itut aamma ilanngussaq 2-tut ilanngunneqarput.

### **Ataatsimiititaliap siunnersuummik suliarinninnera**

Siuliani oqaatigineqartutut isiginiagassat amerlasuut siunnersuutip siullermeerneqarnerani tikinneqarput, taakkulu siunnersuutip matumani pineqartup annertuumik taparserneqarneranik kinguneqarput. Soraarnerussutisiaqalernissamut aaqqissuussinermut peqataasussaatitaaneq siunertaasoq malillugu ingerlasimanngitsoq nalinginnaasumik isumaqatigiissutigineqarpoq. Taamaalillunilu soraarnerussutisiaqarnermik suliassa qarfiup tamarmiusup suleqatigiissitamit immikkut ilisimasalinnik inuttalimmit, soraarnerussutisiaqarnermik aaqqissuussineq oqimaatigiittoq pillugu kaammattuuteqarsinnaasumit, misissorneqarnissaa pisariaqartinneqarpoq. Oqaluuserisassamik matuminnga Inatsisartut oqaluuserinninneranni oqaatigineqartut suleqatigiissitamit taassuminnga tusaaniarneqarnissaat kissaatigineqarpoq.

2026-mi aningaasanut inatsit pillugu Demokraatit, Inuit Ataqatigiit, Siumup, Atassutip kiisalu Naalakkersuisut akornanni november 2025-mi isumaqatigiissutip immikkoortuani 5.4-mi aalajangunneqarpoq soraarnerussutisiaqarnissamut aaqqissuussaaneq siunissamut qulakkeerinnittoq aammalu inuiaqatigiinnut oqimaatigiissaagaq sulissutigineqassasoq, tassungalu ilanngullugu pinngitsoorani soraarnerussutisiaqarnissamut ileqqaartussaaneqarnermik tulluusaasoqassasoq aammalu suliffeqarfeqarfimmiinnarnissamut kajumissaatit pitsaanerulersinneqassasut. Isumaqatigiissutigineqarpoq suliassaq tamanna suleqatigiissitamik, soraarnerussutisiaqarnermik aaqqissuusseqqinnissamut kaammattuutunik suliqaarnissamik siunertaqartumik, pilersitsinikkut ingerlanneqassasoq. Isumaqartoqarporli suleqatigiissitap immikkut ilisimasalinnik inuttaqartup 2026-p ingerlanerani kaammattuuteqannginnerani alloriarnertut siullertut inatsisip atuuttup allannguuteqartinneqarnissaa pisariaqartinneqartoq. Inatsimmik taamatut naleqqussaaneq inatsisissatut siunnersuummik matuminnga saqqummiussinikkut pivoq, partiillu isumaqatigiissuteqartut kissaatigaat taanna ukiakkut ataatsimiinnermi maanna ingerlasumi naammassillugu suliarineqassasoq.

Allannguinnikkut qulakkeerniarneqarpoq tjenestemanditut atorfimmit tjenestemandit akissarsiaasa tamarmiusut ileqqaartussaataaneqarnermik naatsorsuinnermut ilaatinneqannginnissaat. Allannguinnikkut aamma siunertarineqarpoq ileqqaartussaataaneqarnermik eqquutsitsinnginnermi akileraarutit procentianik qaffaanikkut innuttaasut akileraarutitut allagartaat atorlugit akiliisitsisoqartannginnissaa. Taamaaliornikkullu inatsimmi aalajangersakkanik taakkuninnga, arlalinnit isornartorsiorneqartunik, innuttaasut 2026-mi aamma 2027-mi eqqorneqassanngillat.

Soraarnerussutisiaqalernissamut aaqqissuussinermut peqataasussaatitaaneq pillugu inatsimmi naleqqusaanissamik pisariaqartitsisoqarnermik misissuleruniuk siunnersuummi matumani allannguutit suleqatigiissitap immikkut ilisimasalinnik inuttallip aallaavigissagai naatsorsuutigineqarpoq. Taamaalillunilu ilaatigut soraarnerussutisiaqalernissamut aaqqissuussinermut

peqataasussaatitaaneq pillugu soraarnerussutisiaqarnermik suliasaqarfimmut tunngasunik anertuumik sunniutilimmik aalajangiisoqannginnerani suleqatigiissitap immikkut ilisimasalinnik inuttaqartup sulinerata inerneru Naalackersuisunit utaqpeqqaarumaneqarput.

Siunnersuummilli naleqqussaanissamik kissaatit arlallit ataatsimiititaliamit nalilerneqarlutillu suliareqquneqartut siullermeerinninnermi saqqummiunneqarmata ataatsimiititaliamit oqaatigineqassaaq. Taakku ilaat ataasiakkat Inatsisartut Suleriaasianni § 34 naapertorlugu allannguutissatut siunnersuummik saqqummiussivigineqarnissaat pisariaqartoq ataatsimiititaliamit maluginiarneqarpoq. Sinneri ataatsimiititaliap isumaa malillugu allannguinninnissamik piumasaqaammut tunngatillugu ajornakusoorsinnaapput, tamatumalu kingunerisaanik Inatsisartut Suleriaasianni § 28 naapertorlugu taakku inatsisissatut siunnersuutitut saqqummiunneqartariaqassapput.

Demokraatit Atassullu siunnersuummut allannguinnissamik kissaateqanngillat, oqaatigaluguli suleqatigiissitap immikkut ilisimasalinnik inuttaqartup suliaa utaqqimaarneqassasoq. Soraarnerussutisiaqalernissamut aaqqissuussinnermut peqataasussaatitaaneq pillugu aaqqissuussinerup atorunnaarsinneqarnissaanik kissaateqarneq Naleqqamit saqqummiunneqarpoq, tassa isumaqaramik aaqqissuussineq naligiinninnerulersitsisoq aammalu pissakinnernik eqquisoq. Inuit Ataqtigii oqaatigaat inuit perulullutik napparsimasut imaluunniit piffissami sivisunngitsuinnarmi inuusussatut naatsorsuutigineqartut uumatillutik soraarnerussutisiaqalernissamut aaqqissuussinnermut peqataasussaatitaanermik ileqqaakkamik tigusinnaanissaannut periarfissinneqartariaqartut. Taamaattumik perulullutik napparsimasut eqaannerusumik pisinnaaqullugit iliuuseqarnerusinnaaqullugillu ajornartorsiut taanna suleqatigiissitap immikkut ilisimasalinnik inuttaqartup siuliani taaneqartup suliaminut ilanngutissagaa Inuit Ataqtigiiinnit kissaatigineqarpoq, taamaaliornikkut napparsimasut inuunermik sinnerani ileqqaakkaminnik namminneq atuisinnaaqullugit. Qulingiluanik aaqqiissuteqarnissaq Siumumit kissaatigineqarpoq, taakkulu oqaaseqaataanni takuneqarsinnaapput. Aaqqiissutissat ilaatigut ukiorititassanut, katersassat procentiinut, sulisitsisut ileqqaarutissanut tapiliuttagaannut, isertitatigut killigititanut, aaqqissuussineq kajumissuseq naapertorlugu peqataaffigineqarsinnaasumut aammalu soraarnerussutisiallit suliffillit ileqqaarnissamut ilaatinneqannginnissaannut tunngassuteqarput.

Kissaatitut saqqummiunneqartut ilaannut ataasiakkaanut tunngatillugu ataatsimiititaliaq Naalackersuisunut allakkatigut apeqquteqarpoq. Ukiorititassanut killiliussap 25-nik ukiulinnut qaffanneqarnera, ileqqaagassanut procenti 4-ranngortinneqarpat isertitassanullu killigitat 250.000 kr.-innngortinneqarnerat inuit ataasiakkaat soraarnerussutisiassatut ileqqaagaannut taamaalillunilu matussutaasinnaaneranut pitsaanngitsumik kinguneqassasoq akissummi allassimavoq. Tamanna pisortanit tapiissutitut aningaasartuutit amerlinerannik nassataqassaaq, taamaalillunilu aningaasaqarnikkut attassisinnaanermut pitsaanngitsumik aamma kinguneqassalluni. Perululluni napparsimanermi ileqqaakkannik tunniussisarnermut atatillugu

inuit ataasiakkaat soraarnerussutisiassanut ileqqaagaat apeqqutaassasut akissummi allassimavoq. SISA-mi soraarnerussutisiaqalernissamut ileqqaakkat uninngasuutit tunniunneqarnissaat periarfissaanngilaq aammalu soraarnerussutisiaqarnissamut atugassarititaasut allanngortinneqassappata suliffeqarnermi illuatungeriit akornanni isumaqatigiinniaqittoqartariaqassaaq. Aaqqissuussinermi Akileraartarnermut Aqutsisoqarfimmit pilersinneqartumi uninngasuutit imaluunniit SISA-mi aaqqissuussami atuuttumi aningaasanik Akileraartarnermut Aqutsisoqarfimmit akilerneqartunik tigusinissaq periarfissaasooq Naalakkersuisut oqaatigaat. Taamaaliorneq 55 %-imik akitsuuserneqassaaq. Innuttaasut perululluni napparsimaleratarsinnaanermut atatillugu matussutaasussanik saniatigut ilanngussisinnaanerat pisisinnaaneralluunniit soraarnerussutisiaqalernissamut aaqqissuussinermut peqataasussaataaneq pillugu inatsimmi mattunneqanngilaq.

Kiisalu soraarnerussutisiaqalernissamut aaqqissuussinermut peqataasussaataanerup annertuumik allanngortinneqarnissaanik aalajangiinissap soraarnerussutisianut suliasaqarfiup tamarmiusup suleqatigiissitamit immikkut ilisimasalinnik inuttaqartumit naliliiffiqineqarnissaata tungaanut mianersuunneqartariaqarneranik Naalakkersuisut kaammattuuteqarnerat ataatsimiititaliamit maluginiarneqarpoq. Partiit siullermeerinninnermi kissaataannut atatillugu aaqqiissutissatut siunnersuutit aammalu akissuteqaat suleqatigiissitamut immikkut ilisimasalinnik inuttaqartumut Naalakkersuisunit ingerlateqqinniarneqartut ataatsimiititaliap iluarisimaarlugu maluginiarpa. Siuliani allassimasut tunngavigalugit suleqatigiissitamit immikkut ilisimasalinnik inuttaqartumit kaammattuutit ataatsimiititaliamit utaqqimaarumaneqarput, taamaalilluni aalajangiinissamut ataatsimoornerusumik tunngavissaqartoqaqqullugu.

Naalakkersuisut ulloq 25. februar soraarnerussutisiaqalernissamut aaqqissuussinermut peqataasussaataaneq pillugu Inatsisartut inatsisaata allanngortinneqarnissaanik siunnersuummut matumunnga allannguutissatut siunnersuutit saqqummiussaqqarput. Allannguutissatut siunnersuut Inatsisartut nittartagaanni UPA2026/12-ip ataani ilanngussatut nassaarineqarsinnaavoq. Allannguutissatut siunnersuutikkut inatsisip atuutilerfissaa iluarsineqarpoq, siunnersuut naatsorsuutigisamit kingusinnerusukkut naammassillugu suliarineqartussaammat. Inatsisartut inatsisaatali 2026-imiit atuunnissaa aalajangiisimaneqarpoq. Taamaattumik siunnersuutigineqarpoq oqaasertaliussap, 2026-mut Aningaasanut inatsisikkut ileqqaagaqartussaataaneqarpoq naammassineqarsimanngitsup il.il. akilersinniarneqarnissaata 1. januar 2026-imit atuukkunnaarsitsisup, Inatsisartut inatsisaata atuutilernerani atuukkunnaarsinneqarnissaa.

### **Siunnersuutip aningaasaqarnikkut allaffissornikkullu kingunerisassai**

Siunnersuutip pisortanut inuussutissarsiortunullu aningaasaqarnikkut allaffissornikkullu kingunerisassai pillugit siunnersuuteqartup siunnersuutip taakku pillugit immikkoortuani nassuiaatai ataatsimiititaliamit innersuussutigineqarput.

**Ataatsimiititaliap inassuteqaatai**

Naalakkersuisut allannguutissatut siunnersuutaat akuerineqassasq ataatsimiititaliami amerlanerussuteqartut Demokraatineersut, Inuit Ataqatigiinneersut Atassummeersullu inassutigaat.

29. april 2026

UKA2025/12

UPA2026/12

Taama oqaaseqarluni isumaliutissiisummilu allassimasutut paasinnilluni ataatsimiititaliap siunnersuut aappassaaniigassanngortippaa.

---

Aqqalu C. Jerimiassen  
Siulittaasoq

---

Pele Broberg  
Siulittaasup tullia

---

Hans-Erik Enoksen

---

Margrethe Thårup Andersen

---

Ane Hansen

---

UKA2025/12

UPA2026/12

J.nr.: 01.31.03-00103

J.nr.: 01.25.01/26FM-LABU-00012

## **Ilanngussat allattorsimaffiat**

**Ilanngussaq 1:** Soraarnerussutisiaqalernissamut aaqqissuussinermut peqataasussaataaneq pillugu Inatsisartut inatsisaata allanngortinneqarnera pillugu Inatsisartut inatsisaat, UPA26/12, pillugu Aningaasaqarnermut Akileraartarnermullu Ataatsimiititaliap apeqquai.

**Ilanngussaq 2:** Soraarnerussutisiaqalernissamut aaqqissuussinermut peqataasussaataaneq pillugu Inatsisartut inatsisaata allanngortinneqarnera pillugu Inatsisartut inatsisaat, UPA26/12, pillugu Aningaasaqarnermut Akileraartarnermullu Ataatsimiititaliap apeqquaanut Naalakkersuisut akissutaat.